

KOMISAUN EKONOMIA NO DEZENVOLVIMENTU

RELATÓRIU VIZITA FISKALIZASAUN KOMISAUN D IHA POSTU ADMINISTRATIVU UATULARI, UATUCARBAU NO VIQUEQUE VILLA, MUNISIPIU VIQUEQUE

I. INTRODUSAUN

1.1. Enkuadramentu Legal

Komisaun Ekonomia no Dezenvolvimentu, Parlamentu Nasional hala'ó vizita fiskalizasaun bazeia ba art.^o 92^o, art.^o 95^o, n.^o 3 alínea e), kombinadu ho art.^o 145^o n.^o 3) husi Konstituisaun RDTL, no mos bazeia ba art.^o 35^o alínea c), kombinadu ho art.^o 79^o alínea f) husi Rejimentu Parlamentu Nasional.

Vizita ne'é bazeia ba pedidu ne'ebe hato'ó hosi comunidade suku Vessoru husu atu halo fiskalizasaun urjente ba empresa internasional Pembinaan Pulau Sebang Sdn, Bhd. (PPSSB), relasiona konstrusaun irrigasaun Daradau, no mos bazeia ba deliberaun ne'ebe komisaun foti iha loron 20 fulan fevereiru 2020, iha loron ne'é kedas komisaun hato'ó pedidu autorizasaun ba Prezidente Parlamentu Nasional no tuir mai hetan despacho iha loron 24 fulan fevereiru 2020.

Haktuir ba despacho refere, iha loron 11-14 marsu 2020, komisaun D realiza vizita fiskalizasaun ba iha munisipiu Viqueque ho intensaun atu hare no rona direktamente.

1.2. Área Fiskalizasaun

Delegasaun halo fiskalizasaun ba área ne'ebe mak kabe ba kompetensia Komisaun Ekonomia no Dezenvolvimentu hanesan: MAP, SEFOPE, MTCI, Ambiente no Koperativa, maibe komisaun ba hare área sira ne'ebe identifika ona hanesan: Vizita Irigasaun Daradau, Vizita Irigasaun Borala, Vizita Ponte Irabere, Vizita Irigasaun Maluru, Vizita Sentru Formasaun Beasu no Vizita Be'é Manas Kraras. Além de vizita fatin hirak ne'é komisaun hetan informasaun adisional hosi administrador postu administrativo Uatucarbau hodi ba vizita ponte Irabere ne'ebe kotu.

1.3. Métopu Fiskalizasaun

Métodu ne'ebe komisaun uza iha fiskalizasaun ne'e mak vizita direta ba terenu hodi halo observaun no mos koalía direta ho populasaun sira. Depois observaun komisaun reuniaun hodi halo avaliaun ba dados ne'ebe iha molok aprova.

1. Enkontru/dada lia

Delegasaun hasoru malu ho autoridade lokal no comunidade sira.

2. Observasaun direta

KOMISAUN EKONOMIA NO DEZENVOLVIMENTU

Hare projetu fiziku, koalia ho agrikultor sira no rona comunidade nia lamentasoens.

3. Análiza

Cross check dados ne'ebe hetan husi vizita, liga ba ezekusaun orsamentu no dados ne'ebe mai husi governu, hodi hatene kona ba efisiensia no efikasias ezekusaun orsamentu, atu hatene kona ba balansu entre despesas no beneficiariu sira, no atu sukat meta polítika kona ba retornu ekonómiku.

1.4. Objetivu Vizita Fiskalizaun

Objetivu husi vizita fiskalizaun ne'e:

1. Atu hare efisiensia no efikasias iha ezekusaun orsamentu jeral estadu bazeia ba kumprimentu lei no qualidade obra;
2. Rejista no identifika problema ne'ebe iha, relasiona ho ezekusaun orsamentu (balansu ba beneficiariu sira no osan ne'ebe gasta);
3. Atu hare direktamente prosesu no progresu konstrusaun hosi projetu no polítika implementasaun projetu.

1.5. Delegasaun

Iha vizita ne'e delegasaun komisaun D fahe ba grupu rua.

- a. Grupu I, kobre postu administrativu Uatulari no Uatucarbau, ne'ebe kompostu husi deputadu nain 4, tekniku, jornalista no motoristas hanesan tuir mai:
 1. Deputada Virgínia Ana Belo (Prezidente) Xefe Delegasaun
 2. Deputada Olinda Guterres (Sekretária) Membru
 3. Deputadu José Virgílio F. Ferreira Membru
 4. Deputadu Antoninho Bianco Membru
 5. Tekniku, Jornalista no Motoristas
- b. Grupu II, kobre postu administrativu Viqueque Villa, ne'ebe kompostu husi deputadu nain 4, teknika, jornalista no motoristas hanesan tuir mai:
 1. Deputadu Ricardo Baptista (Vice-Prezidente) Xefe Delegasaun
 2. Deputadu António do Santos "55" Membru
 3. Deputadu Alexandrino C. da Cruz Membru
 4. Deputada Regina Freitas Membru

KOMISAUN EKONOMIA NO DEZENVOLVIMENTU

5. Teknika, Jornalista no Motoristas

Além de delegasaun komisaun D, hetan mos akompanhamentu hosi diretor direasaun Agrikultura no Peskas munisipiu Viqueque ho nia tekniku ba iha kada grupu durante hala'ó vizita fiskalizaun iha terrenu.

II. REZULTADU VIZITA TERRENU

2.1. Vizita Konstrusaun Kanal Irigasaun Daradau-Uatulari

Iha vizita ne'e, delegasaun hare katak konstrusaun projetu ne'e lao hela. Delegasaun dada lia ho senhor Segi nudar engenheiro irrigasaun (consultant), informa katak tuir kontratu durasaun konstrusaun ba projetu ida ne'e tinan rua, hahu hosi fulan marsu 2019 no sei termina iha fulan marsu 2021. Total orsamentu \$3,912,226.56 dólares. Empresa implementador (kontrator) mak Pembinaan Pulau Sebang Sdn, Bhd. (PPSSB) no consultant mak PT. SKM JV With Kai Watu Kmanek (KWK). Konstrusaun kanal irrigasaun iha parte primeiru (saluran utama) konstrui ho naruk 1500 metrus. Hafoin parte sekunder nian fahe ba parte tolu hanesan primeiru konstrui ho naruk 3500 metrus, segundu ho naruk 900 metrus no ida ikus liu ho naruk 2500 metrus. Hosi irrigasaun ida ne'e sei fornese be'e ba natar hamutuk 370 hektares ba deit natar iha área suku Vessoru nian.

Liga ba keixa ne'ebe apresenta hosi comunidade balun ba iha Parlamentu Nasional relasiona ho implementasaun projetu ne'e, ne'ebe halo comunidade balun nia natar no plantasaun sai afetadu. Kestaun ida ne'e bainhira delegasaun konfirma ho administrador postu administrativu Uatulari, senhor Tomas Soares da Silva hateten katak parte ne'ebe mak comunidade balun kestiona ne'e mak estrada ne'ebe loke hodi empresa mobiliza material ba iha fatin projetu, maibe ida ne'e problema kikoan ida ne'ebe mak ami autoridade lokal sira mak bele resolve. Lider lokal ne'e haktuir liu tan katak durante implementasaun obra ida ne'e komunikasaun entre empresa, trabalhadores, siguransa no autoridade lokal sira iha ne'e lao diak tebes no bainhira mosu problema ruma parte relevante sira ne'e atende ho urjente hodi resolve, atu nune'e labele difikulta/impede fali obra ne'e.

KOMISAUN EKONOMIA NO DEZENVOLVIMENTU

Hafoin tuir mai delegasaun dada lia ho trabalhador, senhor Ilido Amaral, nudar mandor informa katak total trabalhador lokal ne'ebe servisu iha projetu ne'e hamutuk rua nulu resin. Preokupasaun no difikuldade ne'ebe trabalhador sira infrenta mak horariu servisu hanesan servisu to'ó kalan bo'ot (lembur) empresa la difini klaru atu servisu oras hira no selu ho montante osan hira; kontratu ba trabalhador buruh kasar sira konta kada liron \$6.00 dólar, maibe la konta hahan no trabalhador sira mak prepara rasik hodi lori ba han iha servisu fatin; material siguransa menus hanesan la iha sepatu/botas.



Delegasaun vizita irrigasaun Daradau-Uatulari

2.2. Vizita Intek Irrigasaun Borala-Uatucarbau

Iha vizita ne'e delegasaun hare katak fisikamente intek irrigasaun diak hela no sedimentasaun mak nakonu hela iha kanal irrigasaun no odamatan intek nian. Ne'e bainhira halo tiha normalizasaun, entaun be'e halai normal ona ba natar sira.

Iha vizita ne'e, tuir dada lia ne'ebe delegasaun halo ho administrador postu administrativu Uatucarbau, senhor Mateus Martins Pinto katak hosi kanal irrigasaun ida ne'e fornese be'e ba natar hamutuk 864 hektares. Problema mak tempu udan akontese inundasaun be'e lori hotu sedimentasaun sira ba taka metin tiha intek. Iha escavator ida ne'ebe destakadu iha munisipiu, maibe tenki hato'ó pedidu ba diresaun Agrikultura no Peskas munisipiu, hafoin autoriza mak tun mai hodi halo normalizasaun.

Administrador haktuir katak área natar iha Uatucarbau bo'ot tebes no tinan ida bele halai dala rua, maibe depende ba be'e no mos precisa maquina pesado (escavator) hodi bele normaliza hela deit.

KOMISAUN EKONOMIA NO DEZENVOLVIMENTU

Tuir previsão lider lokal ne'e katak Uatucarbau ba oin, tinan lima/sanulu hanesan ne'e agrikultor sira sei husik ona natar, tanba produs barak maibe la iha merkadu hodi fan. Fan normal lata ida \$5.00 dolar no fan ba empresa lata ida \$7.00-\$10.00 dolar.

Lider lokal ne'e haktuir liu tan katak politika governu nian dehan povu kuda no governu sosa, maibe durante ne'e governu seidauk mai sosa hare'e kulit. CLN (Centro Logística Nacional) mak mai hamutuk ho autoridade lokal sira hodi ba halo sosializasaun ba agrikultor sira kona-ba presu hare'e kulit ne'ebe atu sosa kada kilo grama \$50 centavos, maibe agrikultor sira lakohi ho presu ida ne'e, dehan tanba ki'ik liu no sira hakarak fan deit iha lata ho presu \$12 dolar.

Iha parte seluk deputadu sira koloka kestaun balun liga ho preokupasaun povu nian kona-ba hamlaha, lider lokal ne'e fo sai katak dala balun akontese hanesan ne'e, maibe ne'e laos signifika katak la iha aihan, aihan iha, tanba hare'e kulit iha Uatucarbau familia ida bele hetan to'o lata atus ida, tanba deit sira iha kultura solidaridade ba malu hodi fahe hotu tiha ba familia sira, entaun ikus mai sira hakilar hamlaha. Maibe autoridade lokal ne'e rekonhese katak durante nia mandatu seidauk iha povu Uatucarbau ida mak hakilar ba hamlaha.



Delegasaun vizita irrigasaun Borala-Uatucarbau

KOMISAUN EKONOMIA NO DEZENVOLVIMENTU

2.3. Vizita Irrigasaun Maluru-Viqueque

Iha vizita ne'e delegasaun hare katak intek irrigasaun diak hela no agrikultor sira halo hela natar, maibe halo deit parte balun no natar fatin barak mak abandonadu. Diretor diresaun Agrikultura no Peskas munisipiu Viqueque, senhor Carlos Pinto relata katak irrigasaun iha fatin ida ne'e halo depende ba udan be'en. Konstrusaun ba intek no kanal irrigasaun ida ne'e iha tinan 2012 iha parte kraik, maibe mota sobu, nune'e muda fali ba iha parte leten mak funsiona to'o agora. Iha area ne'e natar hamutuk 29 hektares. Hosi total ne'ebe iha agrikultor sira halo deit 9,5 hektares no 19,5 hektares abandonadu, tanba be'e menus. Além de ne'e, problema seluk ne'ebe agrikultor sira hasoru mak animal comunidade sira nian husik livre hela hodi estraga hare'e sira ne'ebe agrikultor sira kuda, tanba ne'e mak sira sujere ba parte competente apoiu sira hodi halo lutu haleu natar.

Iha biban ida ne'e, diretor hato'o mos informasaun kona-ba irrigasaun Uaguia-Ossu ne'ebe konstrui iha tinan 2012, maibe agora labele halai natar tanba intek no kanal irrigasaun nakonu ho sedimentasaun, no parte diresaun Agrikultura no Peskas munisipiu hato'o ona pedidu ba nasional hodi husu equipamento pessado hodi halo normalizasaun, maibe to'o agora seidak haruka ba munisipiu, tanba iha nasional equipamento pessado limitadu.



Delegasaun ba vizita irrigasaun Maluru-Viqueque Villa

2.4. Vizita Sentru Formasaun Beasu

Sentru formasaun ne'e hari'i iha tinan 2017 ho area formasaun lima hanesan Carpintaria, Soldadura, Electricidade, Canalizaçao no Pedreiro. Formador hamutuk nain nen no kada area formasaun iha formador nain ida no diferente iha area soldadura mak iha formador nain rua.

KOMISAUN EKONOMIA NO DEZENVOLVIMENTU

Iha kada área formasaun iha formandos hamutuk nain sanulu resin lima ne'ebe fahe ba grupu rua, grupu primeiro ema nain lima no grupu segundu ema nain sanulu, tanba fatin mak la suficiente hodi akumula hotu dala ida. Materiais pratika ba área hotu antes ne'e iha kompletu maibe la iha fatin/armagen hodi assegura sasan sira ne'e, nune'e balun at no balun lakon tanba rai deit iha liur. Pratika agora depende pedidu ba empresa ne'ebe deit mak bele fornese materiais hodi halo pratika.

Sentru ne'e mos infrenta problema kona-ba be'e mos kuaze tinan tolu ona, no durante ne'e sira konsumu deit be'e posu ne'ebe mer tanba besik tasi ibun. Sentru formasaun ne'e seidak iha konstrusaun ba moru. Formador sira sujere atu sira bele ba halo estudu komparativu ba iha nasaun seluk hodi nune'e aumenta sira nia kapasidade.

Formandos sira teoria ho pratika hotu ona no sira agora dadaun ba estagiu hela iha be'e manas Kraras no atu rekruta tan estudante foun maibe orsamentu mak seidak iha.



Delegasaun vizita sentru formasaun Beasu-Viqueque Villa

2.5. Vizita Fatin Be'e Manas Kraras

Be'e manas Kraras ne'ebe konsidera nudar fatin turismu komunitariu, nune'e iha tinan ne'e hahu konstrui ba fatin sira hanesan uma baraka no fatin ba picina. Konstrusaun ne'e halo hosi estudante estagiariu sira hosi sentru formasaun Beasu. Fundu ba obra ne'e hosi SEFOPE no implementa hosi sentru Dom Bosco. Total estagiariu ne'ebe hala'o obra ne'e iha ema nain 46, kompostu hosi mane 35 no feto 11. Difikuldade ne'ebe sira infrenta mak equipamento siguransa limitadu. Iha parte seluk estagiariu sira lamenta tebes ho subsidiu ne'ebe sira simu kada fulan ki'ik liu ho deit \$90 dolar, tanba ne'e sira husu atu aumenta sira nia subsidiu. Problema seluk ne'ebe sira hasoru mak be'e mos ne'ebe mak sira konsumu lor-loron ba kuru iha Viqueque Villa ho distansia ne'ebe dok.

KOMISAUN EKONOMIA NO DEZENVOLVIMENTU



Delegasaun vizita be'e manas Kraras-Viqueque Villa

2.6. Vizita Ponte Irabere-Uatucarbau

Hafoin konklui tiha vizita ba iha fatin hirak refere ne'ebe tuir área competência Komisaun D nian, iha mos informasaun adisional hosi administrador postu administrativu Uatucarbau ne'ebe husu ba delegasaun komisaun D atu disponível ba vizita ponte Irabere ne'ebe kotu. Ho pedidu ne'e, tuir mai delegasaun ba kedas vizita fatin refere.

Delegasaun to'o iha fatin refere no hare katak los ponte ne'e kotu duni kauza hosi mota sobu iha fulan julhu tinan 2019. Depois kotu nune'e la iha movimentu transporte ba-mai entre postu administrativu Uatucarbau-Viqueque no postu administrativu Ilomar-Lautem.

Iha fatin hanesan administrador informa katak desde akontesimentu to'o agora hosi parte competente seidauk tun mai halo levantamentu, maibe parte autoridade lokal hato'o ona informasaun ba diresaun MOP munisipiu maibe ate agora seidauk iha resposta.

KOMISAUN EKONOMIA NO DEZENVOLVIMENTU



Delegasaun vizita ponte Irabere ne'e kotu

III. KONKLUZASAUN NO REKOMENDASAUN

3.1. Konkluzsaun

- a. Projetu konstrusaun irrigasaun Daradau fisikamente lao normal no iha duni lamentasaun balun hosi komidade sira, liu-liu estrada ne'ebe mak loke hodi empresa mobiliza material ba fatin projetu atravesa natar no plantasaun komidade nian, maibe ida ne'e autoridade lokal sira konsidera laos problema bo'ot;
- b. Natar iha Uatucarbau ba oin tinan lima/sanulu hanesan ne'e sei la halo, tanba natar nain sira dehan produs barak, maibe la iha merkadu hodi fan, iha parte seluk tuir informasaun hosi autoridade lokal sira katak merkadu iha, maibe presu ne'ebe agrikultor sira propoin mak karun liu;
- c. Intek no kanal iha irrigasaun Borala-Uatucarbau be'e la lao normal, tanba sedimentasaun nakonu iha kanal no odamatan intek;
- d. Intek no kanal iha irrigasaun Maluru fisikamente diak hela maibe be'e menus, nune'e natar fatin barak mak husik abandonadu hela;
- e. Irrigasaun Uaguia-Ossu kuaze la halo natar, tanba intek no kanal irrigasaun nakonu ho sedimentasaun;
- f. Trabalhador lokal ne'ebe servisu iha projetu konstrusaun irrigasaun Daradau kuaze rua nulu resin, maibe problema ne'ebe sira hasoru mak horario servisu hanesan servisu to'oo kalan bo'ot (lembr) empresa la difini klaru atu servisu oras hira no selu ho montante osan hira; kontratu ba

KOMISAUN EKONOMIA NO DEZENVOLVIMENTU

- trabalhador buruh kasar sira konta kada loron \$6.00 dólar, maibe la konta hahan no trabalhador sira mak prepara hahan rasik; material siguransa menus hanesan la iha sepatu/botas;
- g. Sentru formasaun Beasu iha tinan ida ne'e atividade formasaun seidak lao, tanba ho orsamentu duodécimo entaun labele halo rekrutamentu ba estudante foun;
 - h. Formador sira ne'ebe destakadu iha sentru Formasaun Beasu precisa tebes atu haklean sira nia konhesimentu, tanba durante ne'e sira fo formasaun ho konhesimentu ne'ebe limitadu tebes;
 - i. Sentru Formasaun Beasu infrenta problema be'e mos, tanba durante ne'e konsumu deit be'e posu ne'ebe mer tanba besik tasi ibun;
 - j. Sentru Formasaun Beasu la iha moru protesaun hodi proteje animal labele estraga uma formasaun sira no mos la iha armagen hodi rai equipamentos formasaun;
 - k. Estagiariu sira ne'ebe hala'ó kontrusaun iha be'e manas Kraras lamenta ho subsidu ne'ebe sira simu kada fulan \$90 dolar, maibe servisu ne'ebe sira halo todan liu;
 - l. Ponte Irabere ne'ebe liga entre Uatucarbau no Ilomar kotu tanba mota sobu iha tinan kotuk 2019, nune'e la iha movimentu transporte ba-mai.

3.2. Rekomendasaun

- a. Rekomenda ba Ministeriu Agrikultura no Peskas atu mobiliza equipamentu pessado (escavator) hodi normaliza sedimentasaun sira ne'ebe mak taka metin intek no kanal iha irrigasaun Borala no mos irrigasaun seluk tan iha munisipiu Viqueque;
- b. Rekomenda ba Ministeriu Agrikultura no Peskas ba oin atu buka politika oinsa mak hodi bele motiva liu tan agrikultor sira atu iha vontade nafatin hodi halo natar;
- c. Rekomenda ba Ministeriu Agrikultura no Peskas atu kordena ho autoridade lokal sira hodi akompanha no tau matan ba konstrusaun projetu irrigasaun Daradau atu nune'e labele iha impedementu ba obra ne'e;
- d. Rekomenda ba Sékretaria Estado Formasaun Profissiona no Empregu atu tun ba hare no akompanha trabalhador sira ne'ebe servisu iha konstrusaun irrigasaun Daradau-Uatulari no mos estagiariu sira ne'ebe halo konstrusaun iha be'e manas Kraras ne'ebe mak hasoru difikuldade oi-oin iha sira nia servisu fatin;
- e. Rekomenda ba Sekretariu Estadu Formasaun Profissiona no Empregu ba oin tau iha planu ba formador sira iha Sentru Formasaun Beasu atu bele halo estudo komparativu iha rai laran ou rai liur, atu nune'e bele aumenta sira nia konhesimentu;

KOMISAUN EKONOMIA NO DEZENVOLVIMENTU

- f. Rekomenda ba Sekretariu Estadu Formasaun Profissional no Empregu, atu tau iha planu orsamentu hodi konstrui moru protesau no mos armagem ba Sentru Formasaun Beasu;
- g. Rekomenda ba Sekretariu Estadu Formasaun Profissional no Empregu, atu kordena ho Diresaun Nacional Água no Saneamentu hodi kanaliza be´e ba Sentru Formasaun Beasu;
- h. Rekomenda ba Ministeriu Obras Púbricas atu atende urgente hodi hadia fali ponte Irabere ne´ebe kotu.

IV. APROVASAUN

Relatóriu ne´e, hetan ona aprovasaun liu husi reuniaun ordinariu komisaun nian ne´ebé realiza iha loron quarta-feira, 10 junhu 2020, tuku 10h00, Oras Timor Lorosa´e, iha sala komisaun D Parlamentu Nasional. Prosesu aprovasaun hetan partisipasaun hosi membrus komisaun nain 8 ho rezultadu aprovasaun a favor 8 kontra 0 no abstensaun 0.

V. LIAN IKUS

Ida ne´e mak relatóriu vizita fiskalizasaun Komisaun Ekonomia no Dezenvolvimentu iha postu administrativu Uatulari, Uatucarbau no Viqueque Villa, Munisipiu Viqueque no husu autoridade kompetente atu konsidera relatóriu ne´e.

Obrigadu.

Prezidente Komisaun,

Relator,

Deputadu Antoninho Bianco

Deputadu Alexandrino C. da Cruz